

বিজ্ঞানীর বাড়িতে গিয়ে যা দেখলেন চট্টগ্রামের লোক

♦ আবেগানন্দ দাশ

চট্টগ্রামের এক লোক একজন বিজ্ঞানীর বাড়িতে গিয়ে দেখলেন বিশাল এক দেয়াল। সেই দেয়ালখানা ঘড়িতে পরিপূর্ণ।

তা দেখে লোকটি বিজ্ঞানীকে জিজ্ঞাসা করলেন,

‘এখানে এতগুলো ঘড়ি কেন?’

‘এগুলো হল মিথ্যা ঘড়ি। প্রত্যেক মানুষের জন্য একটি করে রাখা আছে। কেউ যদি একবার মিথ্যা কথা বলে তাহলে ঘড়ির কাঁটা একবার ঘুরবে, দুটি মিথ্যা কথা বললে দুইবার ঘুরবে। এভাবে যে যতবার মিথ্যা কথা বলবে তার ঘড়ির কাঁটা ততবার ঘুরবে।’

‘আচ্ছা, ওই ঘড়িটি কার?’

‘এটা মাদার তেরসার ঘড়ি। এটার কাঁটা একবারও

ঘুরেনি, তার মানে তিনি জীবনে একটি মিথ্যাও বলেননি।’

‘আচ্ছা, মার্কিন প্রেসিডেন্ট ডোনাল্ড ট্রাম্প এবং ইসরায়েলের প্রধানমন্ত্রী বেঞ্জামিন নেতানিয়াহুর ঘড়িগুলো কই?’

‘দেখুন, সাধারণত রাজনীতিবিদদের ঘড়িগুলো আমাদের অফিসরুমে থাকে। ওগুলো আমরা টেবিল ফ্যান হিসেবে ব্যবহার করি। কিন্তু মার্কিন প্রেসিডেন্ট ডোনাল্ড ট্রাম্প এবং ইসরায়েলের প্রধানমন্ত্রী বেঞ্জামিন নেতানিয়াহুর ঘড়ির কাঁটাগুলো আমরা হেলিকপ্টার উড়ানোর কাজে ব্যবহার করি। ওগুলো এত জোরে ঘুরে যে অফিসিয়াল কোনো কাজে ব্যবহারের জো নেই।’

মাইকেল মধুসূদন দত্ত কে নিয়ে জনপ্রিয় ঘটনা

♦ জনশ্রুতি

সেই সদ্য প্রকাশিত হয়েছে ‘মেঘনাদবধ কাব্য’। একদিন মেঘনাদবধ কাব্য-র স্রষ্টা মহাকবি মাইকেল মধুসূদন দত্ত কোনো এক বিশেষ কাজের জন্য গিয়েছিলেন বাজারে। সেখানে দেখলেন এক অদ্ভুত দৃশ্য! কী দৃশ্য?

কবি দেখলেন এক সাধারণ দোকানদার তার সামনে বসে মন দিয়ে ‘মেঘনাদবধ, কাব্য পাঠ করছেন!

কৌতুহলাবিষ্ট হয়ে রহস্যপ্রিয় কবি সেই দোকানে ঢুকে দোকানদারকে জিজ্ঞাসা করলেন, ‘মশাই, কী বই পড়ছেন?’

দোকানদার বই থেকে মুখ তুলে বললেন, ‘আজ্ঞে এ একখানি নতুন কাব্য।’ রসিক মধুসূদন বললেন, ‘কাব্য পড়ছেন? বাংলা সাহিত্যে তো তেমন কোনো উল্লেখযোগ্য কবিতাই নেই, তা আবার কাব্য! হাঃ!’

দোকানদার মাইকেলকে বুঝিয়ে বললেন, ‘সে কী মশাই, এই একখানি মাত্র কাব্যই তো যে কোনো জাতির ভাষাকে গৌরবান্বিত করতে পারে।’

হেসে মধুসূদন বললেন, ‘তাই নাকি মশাই, তা এটা কী রকম কাব্য একটু পড়ুন তো দেখি, শুনি।’

মধুসূদনের কথা শুনে দোকানদার সাহেববেশী মাইকেলের দিকে সন্দেহের দৃষ্টিতে তাকিয়ে ঠোঁট বঁকিয়ে বললেন, ‘আমার মনে হয় আপনি এই বইয়ের ভাষা ঠিক বুঝতে পারবেন না। শুনে কী কোনো লাভ হবে?’

মাইকেল বললেন, ‘কেন মশাই, এর ভাষা বুঝি খুব কঠিন? একবার চেষ্টা করে দেখতে দোষ কী?’

নাছোড় মাইকেলের কথা অগ্রাহ্য না করতে পেরে অগত্যা সেই কাব্যপ্রিয় দোকানদার ‘মেঘনাদবধ কাব্য’ জোরে জোরে পাঠ করে শোনাতে লাগলেন। কিন্তু ঘুণাক্ষরেও চিনতে পারলেন না সম্মুখে দাঁড়িয়ে থাকা স্বয়ং কবিকে। কবিও সারাক্ষণ রসিকতা করে গেলেন, কিন্তু নিজের পরিচয় দিলেন না।

*মাইকেল মধুসূদন দত্ত এবং রসিক দোকানদারের এই ঘটনাটি কোনো ঐতিহাসিক সত্য বা প্রমাণিত তথ্য নয়, বরং এটি বাংলা সাহিত্যের একটি জনশ্রুতি।

মঙ্গল গ্রহে অভিযান ব্যর্থ, নাসাকে ধুয়ে দিল ওয়াসা!

♦ টং এর দোকানের মামা

এতদিন কোটি কোটি ডলার খরচ করে নাসা মঙ্গল গ্রহে পানির সামান্যতম কণার সন্ধান চালিয়ে আসছিল। অথচ ওয়াসার এক বিশেষ পরিদর্শক দল মঙ্গলে পৌঁছানোর মাত্র ২৪ ঘণ্টার মধ্যে সেখানে বিপুল পানির সন্ধান পেয়েছে। শুধু পানিই নয়, লাল গ্রহের রাস্তাঘাট কেটে সেখানে একাকার অবস্থা তৈরি করেছে ওয়াসা।

সম্প্রতি নাসা মঙ্গলে গর্ত খুঁড়ে পানির খোঁজ না পেয়ে হতাশ হয়ে পড়েছিল। খবরটি কানে পৌঁছানো মাত্রই ওয়াসার এক উর্ধ্বতন কর্মকর্তা ‘নাসা একটা অপদার্থ সংস্থা! গর্ত কী করে খুঁড়তে হয় এরা জানেই না। মাত্র তিন ইঞ্চি মাটি খুঁড়ে নাকি পানির আশা করছে! ওয়াসাকে দায়িত্ব দিন, কালকের মধ্যে লাল গ্রহকে ‘ভাসমান গ্রহ’ বানিয়ে দিচ্ছি।’

ওয়াসার বিশেষজ্ঞ দল বিশেষ স্পেসশিপে চড়ে মাটি কাটার কোদাল, পাইপ আর রোলার নিয়ে মঙ্গলে অবতরণ করে। অবতরণের ঠিক দুই ঘণ্টার মাথায় তারা মঙ্গলের অলি-গলি খুঁড়ে একাকার করে ফেলে। মঙ্গল গ্রহের লাল মাটি নাকি ওয়াসা রাস্তা খোঁড়ার জন্যই একদম উপযুক্ত।

নাসার বিজ্ঞানীরা টেলিস্কোপে চোখ রেখে আঁতকে উঠে দেখেন, মঙ্গলের যে ধূসর ধূসর লাল মাটি ছিল, তা এখন নর্দমার পানি আর কাদায় থিকথিক করছে। নাসার বিখ্যাত রোভারটি এখন ওয়াসার খোঁড়া এক বিশাল ম্যানহোলে পড়ে।

ওয়াসার প্রজেক্ট ডিরেক্টর এক প্রেস ব্রিফিংয়ে নাসাকে ধুয়ে দিয়ে বলেন, ‘নাসা টেকনোলজি পারে, কিন্তু মঙ্গলের উন্নয়ন বোঝে না। উন্নয়ন মানেই খোঁড়াখুঁড়ি! আমরা মাত্র কাজ শুরু করলাম। পাইপলাইন বসানোর পর আবার ড্রেনেজ লাইনের জন্য কাটব, তারপর ডাবল ড্রেনের জন্য আবার খুঁড়ব...’

নাসার বিজ্ঞানীরা এখন ওয়াসা কার্যালয়ে কল দিচ্ছেন, আকুতি জানাচ্ছেন, ‘ভাইরে ভাই, আমরা ভুলেও আর মহাকাশে পানির খোঁজ করব না, তোমরা দয়া করে পাইপলাইন বসানো বন্ধ করো!’

তবে ওয়াসা স্পষ্ট জানিয়ে দিয়েছে, মঙ্গলের প্রতিটি পাড়ায় আগামী পাঁচ বছর নিয়মিত খোঁড়াখুঁড়ি চলবে। ততদিনে নাসার বিজ্ঞানীদের মঙ্গল গ্রহ ছেড়ে সোজা শনি বা শুক্র গ্রহে পালিয়ে যাওয়া ছাড়া আর কোনো উপায় নেই।

কৌতুক

* ডিম আগে, না মুরগি?

এক রেস্টোরাঁয় বসে দুই বন্ধুর মধ্যে কথা হচ্ছিল ‘দোস্ত, ডিম আগে, না মুরগি আগে?’ ‘তুই যেটার অর্ডার আগে দিবি ওইটাই আগে আসবে।’

* লুকানো ক্যামেরা

তাসিনের বাড়িতে বেড়াতে গেছে বুশরা। গিয়ে দেখলো তাসিন সারা ঘর আতিপাতি করে কী যেন খুঁজছে। বুশরা জিজ্ঞাসা করলো, ‘কী খুঁজছো?’ ‘লুকানো ক্যামেরা।’ চোখ কপালে তুলে বুশরা বলল, ‘বলো কি! তোমার ঘরে লুকানো ক্যামেরা লাগাল কে?’

‘ওই টেলিভিশন চ্যানেলওয়ালারা।’

‘কী করে বুঝলো?’

‘একটু পরপরই বলে, ‘আপনারা দেখছেন অংবাং টিভি।’ আমি যে অংবাং টিভি দেখছি, ও ব্যাটা বুঝল কী করে!’

* ভূমি দুই মাইল

টাইটানিক ডুবছে, চারিদিকে ছড়োছড়ি, কেউ ‘বাঁচাও, বাঁচাও’ বলে চিংকার করছে, কেউবা স্রোতার কাছে ক্ষমা চেয়ে নিচ্ছে।

আবার কেউ বাঁচার অবলম্বনের খোঁজে দৌঁড়-ঝাঁপে আর ছোট্ট-ছুটিতে ব্যস্ত।

এমন বিপদসঙ্কুল মুহূর্তে এক ইতালীয় ভদ্রলোক তার পাশেই নির্বিকার দাঁড়ানো একজন বাঙালির কাছে একটু তথ্য চেয়ে সহায়তা প্রার্থনা করলেন।

: এখান থেকে ভূমি কতো দূরে?

: দুই মাইল

: মাত্র দুই মাইল, তাহলে গাধাগুলো এমন চিৎলাচ্ছে ক্যান? আমার তো এর থেকে অনেক বেশি সাঁতারের অভিজ্ঞতা আছে।

ভদ্রলোক আর বেশি অপেক্ষা করাটাকে কোনোমতেই সমীচীন মনে করলেন না।

ঝাঁপ দিয়ে একটু পরেই জাহাজের কাছটাতে এসে জিজ্ঞেস করলেন,

: আচ্ছা, বলুনতো কোনদিকে দুইমাইল?

: নিচের দিকে।

* চেয়ার

জাদুঘরে ঘুরতে ঘুরতে ক্লান্ত হয়ে একটা চেয়ারে বসে পড়লেন মকবুল।

ছুটে এলেন জাদুঘরের কর্মীরা। বললেন, ‘আরে, করছেন কী করছেন কী! এটা নবাব সিরাজউদ্দৌলার চেয়ার!’

‘ভাই, একটু বসি। সিরাজ ভাই আইলেই উইঠা যাব।’

* ইংরেজি ক্লাস

নোয়াখালীর এক স্কুলে ইংরেজি ক্লাসে শিক্ষক ‘এরোই কুদুইচ্চা, ক ছাই আসবাবপত্র ইংরাজী কিয়া?’

(মাথা চুলকে) ‘হারিনা চার!’

‘বেরি গুড, তয় উচ্চারণডা হইলো গিয়া হারনিচার!!’